



partii naleraq

Nuuk, 26. marts 2015

Hans Enoksen

UPA2015/16

Illoqarfinni nunaqarfinnilu amerlasuuni aqquserngit aserfallassimaqisut qanoq pitsanngorsarneqarsinnaanerata pillugu apeqquteqaat aallaavigalugu oqallinnissamik siunnersuut.

(Inatsisartunut Ilaasortaq Anders Olsen, Siumut)

Siullermeerneqarnera

Inatsisartunut Ilaasortaq Anders Olsen Siumut, apeqquteqaat aallaavigalugu illoqarfinni nunaqarfinnilu aqquserngit aserfallassimaqisut qanoq pitsanngorsarneqarsinnaanerata pillugu oqallinnissamik siunnersuuteqarpoq, tamannalu pillugu Partii Naleqqami oqaasissagut saqqummiutissavagut.

Siullermik oqallissaarisoq qutsavigissavarput sinerissami illoqarfinni nunaqarfinnilu aqqusinilunnersuarput pillugu saqqummiussaqaarmat, siunnersuuteqartormi ilumoorpoq sumiiffiit ilaanni assut pitsaanngitsunik aqqusineqartut pitsanngorsartariaqarlunnalersimasullu sumiiffinni amerlasuuni.

Nunatsinni illoqarfinni nunaqarfinnilu amerlasuuni aqqusineqarnikkut assut ajortumik atugassaqaartitsivugut naak aningaasanut inatsisikkut kommuninut ataatsimoortumik tapiissutit aqqutigalugit tunniussisoqartaraluartoq takusinnaavarput tamanna pissutsinik pitsaanerulersinngitsoq naak aningaasanik ukiut tamaasa tapiisoqartaraluartoq.

Illoqarfiit nunaqarfiillu aqqusineqarnikkut pitsaanerusumik atugassaqarfiusut nunatsinni taakkuupput kommunit aningaasarissaarnerusut soorunami tamanna aamma ajunngilluinnarpoq tapersersortariaqarlunilu.

Kisiannili kommunit aningaasatigut inissisimalluanngitsut illoqarfittai nunaqarfittaalu ilanngullugit ilaatigut pitsaanngivissunik aqqusineqarnikkut atugassaqarfiupput. Tamannalumi aamma assakaasulinnik angalaffigissallugit angalaffigalugillu pitsaanerpaajunnginnerat sumiiffinni naammagittaalliutigineqartarnerat tusarsaasarpoq pingaartumik biiliutilinnik aqqusinermut akileraarutit qaffanneqaraangata.

Aqqusineqarnikkut periarfissat pitsaanerulertariaqartut isumaqatigiissutigisariaqarparput, tassami biiliutillit aamma aqqusinermut atuinerminnut akileraartinneqartarput mikigisassaangitsunik, tupinnangitsumillu aqqusiniluttuni najugallit biiliutillit aammalu pisuinnaat aqputaannik pitsaanngippallaartunik atugassaqarfiusut kommuninut naammagittaalliutigineqartarlutik, taamaakkaluartorlu ilaatigut pitsaanerusumik atugassaqarfiulissanatik.

Illoqarfinni sinerissamiittuni aqqusineqarnikkut pissutsit pitsaanerulissappata Partii Naleqqamiit kommuninut kaammattuutigissavarput aningaasat ataatsimoortumik tapiissutitigut tunniuteriikkat aqqusinermut atorneqartarnissaat salliuteqqullugu, pingaartumik aamma nunaqarfiit puigornagit.

Nunaqarfinni aamma aqqusineqarnikkut pissutsit pitsaanerpaajunngitsut oqaatigisariaqarput, naak Naalakkersuisut akissutaanni oqaatigineqaraluartoq ukiut tamaasa ataatsimoortumik tapiissutit aqputigalugit akiliisoqartartoq.

Tassami tamatuma kingunerissagaluarpa pitsaanerusumik aqqusinermitigut inerisaasoqarnissaa, kisianni tassa amerlanerpaani malugineqarneq ajormat aningaasaliinikkut pitsanngorsaasoqartarnera, tassami takusagut allatut isikkoqartarmata ilaatigullu ukiut arlerlugit pitsanngorsaasoqassanani.

Tamannalumi aamma eqqagassanik assartuisarnermi assorujussuaq ajornartorsiutaasarmat, pingaartumik nunaqarfiit illoqarfiillu isorliunerusut eqqarsaatigalugit. Tassami eqqiluisaarnikkut periarfissat pitsaanerulissappata aqqusinermitigut pitsanngorsaaniisaq Anders Olsen-ip siunnersuutaa saneqqunneqarsinnaanngimmat.

Aningaasaqarnermut Naalakkersuisumut Partii Naleqqamiit qinnutigissavarput aqqusineqarnermut ataatsimoortumik tapiissutit aqputigalugit kommuninut tunniunneqarlutik aningaasaliinerit illoqarfikkaarlugit nunaqarfikkaarlugillu qanoq annertutiginersut allaganngorlugit paaserusullugit.

Tassami ukiut tamaasa aningaasat tunniunneqartartut aqqusineqarnermut pitsanngorsaaniissamut atugassat nunaqarfinni illoqarfinnilu amerlanerpaani malugineqarneq ajormata oqarluaannaraanni

pitsaaneruvoq atuisoqarneq ajortoq, tassami ukiut arlerlugit sumiiffiit ilaanni aqqusinertigut pitsanngorsaasoqanngivittarmat.

Tassa nunaqarfippassuarni sanaartugassatigut pisariaqartitsisoqaqaaq illut ilaqutariinnut naleqqutut, meeqqeriviit, utoqqaat illui, umiarsualiviit, aqquserngit, atuarfiit allallu pitsanngorsagassarpasuit akissaqartinnagit kinguarsarneqartuarput, tamannalumi ilumoortuaannanngitsoq takussutissaqarpugut.

Ukioq kingulleq sanaartugassanut aningaasat nunaqarfinnut immikkoortitat 20 million koruunit allarlunnarmut illoqarfinnut aqquserniornissamut atugassatut nuunneqarput, tamannalumi Partii Naleqqamiit pissusissamisuunngilluinnartutut isigaarput, ilaatigullu mitallinertut taaneqarsinnaalluni, nunaqarfinnimi pisariaqartitsineq annertoqqimmat, aningaasammi nunaqarfinnut immikkoortinneqarnikummata. Ikinngutitta ilaata oqartarneratuut oqartariaqarpunga *”Qaa iluamik”*.

Kisianni aamma aqqusinertigut pitsaasumik pitsanngorsaasoqarsinnaasoq takussutissaqarpugut, qanga Nuup kommunerisimasaa nersugassaammat, tassami nunaqarfinni aqqusinerinnerpaat Qeqertarsuatsiaat Kapisillillu tikillugit nuannerluinnartarmata, tassuuna takuneqarsinnaavoq piunassuseqaraanni qanoq pitsaatigisumik angusaqartoqarsinnaasoq, soorunami aamma qinikkatut nunaqarfimmi sullissisimasut nersualaagassapput aamma uteriiseraanni angusaqartoqarsinnaasoq takutimmasuk.

Taamatut oqaaseqarluta oqallissaarummut isumagut anippagut neriuutigalugu arlaatigut alloriarnissamut Inatsisartut aamma isummorsorluarumaartut.